



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 10

By-election ka nung British PM Boris Johnson teloki takok mongutet

Wimbledon nung Naomi Osaka masayatsü



VOL. XVIII NO. 245 (ADOK 245) DIMAPUR

KÜPTOKNÜ (SATURDAY)

AAMI (JUNE) 19, 2021

₹ 5.00

COVID-19 Nagaland: 56 dak putet; 362 taneptsü angu

Kohima, June 18, 2021 (TYO): Nagaland nung tanü agi anogo 13 buba COVID-19 puteter dang nungibo taneptsü angur timba liasü.

Hokolbarnü COVID-19 puteta alir nisung 362 taneptsü angu aser nisung 56 dak putet. Tanü puteterem züngsema nisung 24,097 dak putetogo.

"Tanü nisung 56 dak COVID-19 putet. Parnokji Kohima o Dimapur nung terer (10), Kohima nung 12, Mokokchung nung 14, Mon nung 4, Peren nung 8, Phek nung 3, Tuensang nung 3 aser Wokha o Zunheboto nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni, Hokolbarnü COVID-19 puteta alir nisung 362 taneptsü angu. Parnokji Dimapur nung 234, Kohima nung 45, Wokha nung 29, Mon nung 19, Mokokchung nung 17, Kiphire, Longleng o Phek nung pungugu (5) aser Peren, Tuensang o Zunheboto nung kaka (1) lir" ta paisa metetdaksü.

Nagaland nung COVID-19 nungi taneptsü angur 86.68%

kümogo aser tang nisung 2,059 anepaludar, ta Dr Kikon-isa ashi.

Tanü Phek nung nisung ka asüba züngsema tasür ajak agi 467 kümogo, saka nisung 14 bo tanga tashidak ajanga asü, ta paisa shisem.

"Nagaland nung COVID-19 alitsü akok ta temolung melemi bilemba sample 2,12,968 tendangogo. RT-PCR ajanga 95,035, TrueNat ajanga 59,439 aser Rapid Antigen Test ajanga 58,494 tendang" ta Dr Kikon-isa metetdaksü.

"Brihostibar tashi nung nisung 3,34,912 nem COVID-19 vaccine indang dose 3,90,118 agütsüogo" ta State Immunization Officer Dr Ritu Thurr-ia metetdaksü.

Vaccine agirtemji frontline workers 59,797, healthcare workers 15,739, arishi küm 45 ser temapur 1,36,349 aser arishi küm 18-44 tsüngda alir 1,23,027 lir, ta paisa ashi.

"Vaccine agirtem rongnungisa nisung 55,206-i dose anaprong agiogo. Parnokji frontline workers 28,315, healthcare workers 10,328 aser arishi küm 45 ser temapur 16,562 lir" ta Dr Thurr-isa metetdaksü.

India nung Oct. tashi nung Covid-19 wara tasembuba atongtsü

New Delhi, June 18, 2021 (Agencies): India nung taküm October ita tashi nung Covid-19 wara tasembuba agi kongshitsü. Ajisüaka, wara tanabuba dang nungibo tasembuba jiang tajungba keddangtsü ta medical nung mongin nisung telok kati ashi.

Covid-19 wara ya küm ka shi public health tebilemsü ka ama alitsü, ta parnokisa metetdaksü.

India nung Covid-19 wara tasembuba indang survey ka June 3-17 tashi agiogo aser iba mapang alima nung healthcare specialist, doctor, scientist, virologist, epidemiologist aser professor 40 dang tasüngdangba balala asüngdangba liasü.

Parnok rongungi 85% temai October ita tashi nung Covid wara tasembuba atongtsü ta ashi aser nisung 12-i September ita tashi nung atongtsü ta ashi.

India nung April-May ita Covid-19 wara tanabuba agi kanga mejungi kongshi aser iba mapang anogoshia nisung aika dak putetba den aika süogo.

Wara tanabuba mapang vaccine, oxygen, mozü aser mozü kidang yipden agi meperiba khurettem ajuruogo. Ajisüaka, tangbo linük nung state sorkar balalai tenokdangtem agüja azüoktsü merangba agi Covid-19 puteter aser asürtem kanga ajema küma arudar.

Dimapur district nung lockdown tenokdangba agütsüsemmer

Nikongdang 4:00 nungi anepdang 5:00 tashi senzüsensong noktanger

Dimapur, June 18, 2021 (TYO): Dimapur district nung June 19 nungi 30 tashi lockdown tenokdangba kar agütsüsemmer ta Deputy Commissioner Rajesh Soundararajan, IAS-i tanü metetdaksüogo.

Iba mapang district ajunga nung medical mesüra tanga rongdak nüngdak aser ozüngi melartem dak alaka nikongdang 4:00 ako nungi anepdang 5:00 ako tashi nisung/garitem senzüsü memelar, ta Dimapur DC-i ashi.

Tangalen nungi Dimapur-i arurtemi Negative COVID-19 test Report (RT-PCR/TruNat/CBNAAT) mesüra COVID-19 Vaccination Completion Certificate ka bener arutsüla. Külen, SOP nung lateta aliba inyakyim nung Interstate Passengers senzüsü melar, ta paisa metetdaksü.

Points of Entry nung akangkanga mittsü aser Dimapur District telungi non-essential movement memelatsü.

Iba mapang Deobar dak alaka tanüngba anogo ajak anepdang 6:00 ako nungi nikongdang 2:00 ako tashi aonsotsü, ango/shi, mamatzü, bakery, local grocery stores, essential commodities, animal feed dokantem aser electronic & print media, telecom/ internet service providers lapoktsü melar.

Maneni, Hombor, Mongulbar, Brihostibar aser Hokolbar anepdang 6:00 ako nungi

nikongdang 2:00 ako tashi Hardware, Agricultural tools/ equipments/ Materials, Stationeries, Mobile phones/ repairing, computer accessories, tyre repair shops, garages, electrical stores, Electronics/ repairing aser steel fabrications units lapoktsü melar.

Supermarket aser lenmang tezülen yokyayokjiba noktanger aser item nisungtemi pei pei colony/yimtsüngtem nung ayoktsü. Petrol pump, food delivery, groceries delivery aser tanga e-commerce service providers lapoktsü melar.

Nisung anenzükba hotel tem nung staff tajemba lia lapoktsü melar aser anenzükertem ket nung COVID-19 negative test alitsüla.

Asüpila aser kiyimba sentongtem nung nisung 20 dak tema adenshitsu memelar. Sentepsenji aser lokti adenshitsu maneni noktanger saka COVID-19 inyakyim sülen anidaka nisung 20 tashi prayer meetings & fellowships agitsü melar ta Dimapur DC-isa metetdaksü.

School/college indang office den nija business office ajaki DTF Dimapur dang nungi jelia temelaba meshiba sülen staff keddangtsü akok. Maneni, COVID-19 vaccine agiba maparen nung yariteptsü atema Common Service Centre (CSC) ajak lapoktsü melar.

Iba mapang tang nüngdakbatem/chiyungtsü aser medical abenba garitem den four lane & railway mapa nung senzüba garitem dak alaka tanga garitem senzüsü memelar, ta Dimapur DC-i ashi.

Healthcare facility, Pharmacy, Clinic, Hospital, Nursing Home ajak lapoktsü aser animal healthcare, COVID 19 vaccination & testing, medical emergency atema healthcare worker ajak senzüsü melar.

District Administration, Police, security forces, District Court Fire & Emergency Services, Medical, Postal, NIC, NSDMA, Home Guards and Civil Defence, SDRF, Power, PHE, Food & Civil Supplies, Treasury & Accounts, Taxes, Banks/ ATMs, IPR, AIR and Doordarshan, Social Welfare Department including Functioning of Sakhi One Stop Centre, Women Helpline, Child Protection services, Anganwadi services, LPG services including their delivery, distribution and transportation, Private water tanker/ carriers, Prison and related services, Courier Services, Dimapur Municipal Council, Chumukedima/ Medziphema/ Niuland Town Council, Food Corporation of India Ltd. Power Grid Corporation of India Limited nung keddangtsü aser staff senzüsü melar.

Manipur nung COVID-19 indang Delta variant putetogo

Imphal, June 18, 2021 (Agencies): Manipur nung nisung 18 dak COVID-19 indang Delta tapu aliba putetogo ta Hokolbarnü Manipur CM, N Biren Singh-i metetdaksü.

Hyderabad nung aliba laboratory nung tendangdang COVID-19 Delta variant kuli angu aser ano sample aika tendangdar, ta pai ashi.

Manipur nungi sample 20 tashi Hyderabad nung tendangtsü atema bener yokba nungi nisung

18 dak Delta variant alibaji putet.

CM Biren Singh-isa nübertem dang sorkari latetba SoP sülen anidaksü mepishia metetdaksü.

Manipur nung home isolation nung alirtem dak Delta variant anepalutsü atema mozü talila agütsüta, ta paisa ashi.

"Delta variant ya alpha variant dang nungi tekaraba menateper anungji nisung ajaki kidanga mask enoktsüla aser COVID inyakyim sülen anidaksü metetdaksür" ta Manipur sorkar sangsong ka nung

ashi. Hokolbarnü Manipur nung nisung 603 dak COVID-19 putet aser parnok züngsema tang nisung 9246 anepaludar. Kasa mapang COVID-19 puteta alir nisung 12 tashi asü.

COVID-19 Delta variant ya India nung mezüng putet aser Centers for Disease Control and Prevention (CDCP)-i "variant of concern" ta lemsüka lir.

COVID-19 Delta variant ya Alpha variant dang nungi 1.6 agi tekaraba menateper.

ASENOK MOZÜ KITEM ASER YANGJI TEYARI ANGÜTSÜBATEM INDANG METETDI (SHILEM-III)

National Health Mission sentong ajanga center government-i state shia nung lapoka aliba Sub Centre, Public Health Centre, Community Health Centre aser District Hospital-tem ajak nem shirangertem nem angati agütsüta asoshi sen agütsür. (Government mozü kidang mozü angati mengura, aji nübertemi bushitsü tim.) Mozü kidang shirangertem nem mozü agütsüta asoshi list ka item ya dang agütsüta ta lateta maka, anungji pei pei state nung lateta akaba " State Essential Drug List" nung shimteta akaba mozütem mozü kidangi taneptsü bushia arur shirangertem nem angati agütsüta. Tang Nagaland nung mozü ki shia nung angati angutsüba mozütemji Sub center nung mozü tapu 61, PHC nung mozü tapu 70, CHC nung mozü tapu 155 aser District Hospital nung mozü tapu 215 angutsüba state government-i lateta lir. Item mozü kitem nung mozü alitsü asoshi Nagaland nem center sorkari senotsü lemsütsübjaji 2015-16 küm sen lakh 212.86, 2016-17 küm sen lakh 351.07, 2017-2018 küm sen lakh 250, 2018-19 küm sen lakh 210, 2019-2020 küm sen lakh 150, 2020-2021 küm sen lakh 401.35 aser 2021-2022 küm asoshi sen lakh 664.78 lemsükja lir. Ano, government mozü kidangi taneptsü bushia arur shirangertem senotsü meindokdaksü tashidak shitik putettsü asoshi mozü ki ajak nung "Free Diagnostic Services Initiative" ajanga teyari agütsür. Item angati tashidak tendangbatem mapa inyaksü asoshi center government-i state shia nem mozü ki shia asoshi senotsü agütsür. Government mozü kitem nung tashidak tendangbatem teyariji mozü ki yari Sub center nung Laboratory test 7, PHC nung 19, CHC nung 39 aser District Hospital nung 57 bo tendangtetsüba takdang aser oset akatsüla. Ano, NHM ajanga government mozü kidang shirangertem atema Free Diagnostics Services agütsür. Iba teyari ya Pradhan Mantri National Dialysis Programme (PMNDP) ajanga Nagaland nem 2016-17 küm sen lakh 46.74, 2017-18 küm sen lakh 46.74, 2018-19 küm sen lakh 39.34, 2019-2020 küm sen lakh 30 aser 2021-2022 küm atema sen lakh 175.45 lemsükja lir. M/S. Fairfax India Charitable Foundation-i Nagaland dena state 10 nem Free dialysis machine tenla agütsüogo.

[Iba osang ya Wt.Limatula Yaden, shiba DGHRD, Central Board of Indirect Taxes & Customs , New Delhi nung tang Additional Director General lir aser taoba küm 6 tashi Ministry of Health & Family Welfare, Govt. of India nung NHM Policy Director liasü, lai yokba nungi nübertem ajangzüksü asoshi adoktsür.]

Kohima nung taxi senzütsü melar; totuyuba kar agütsür

Dimapur, Aami/June 18 (TYO): Home Department ajanga June 12, 2021 nü metetdaksüba den bendenloksema aser ano driver aser passenger tem takum kumzüka alitsü atema Deputy Commissioner aser Chairman, District Task Force Kohima ajanga totuyuba kar agütsüsemogo.

a) Taxi tem passenger timba agi nisung ana mener senzütsü melar, aser tejaklen menden nung passenger kata mamentsü.

b) Passenger ka danga mask magi jajaba ngura, aibelener aser driver-na prong dang senchi sen 200 achitsü.

c) Taxi aser auto rickshaw driver temi trip aoba shia teti kongshiba tesem, talisa door knobs, door handles amala nung mesen tepsetba mozü akhatsüla aser gari nung hand sanitizer ayutsüla.

d) Driver temi parnok

COVID-19 tendangba report ya RAT/RTPCR /TrueNat/CBNAAT nungi asütsüla. Parnok angati tendangtsü. COVID-19 tendangtsü atema RTO, Kohima ajanga Chief Medical Officer, Kohima nem tenüng agütsütsüla.

e) COVID mozü dosen anaprong agir aliba driver tem clause (d) nung shia aliba küboki maittsü. Driver-i teti vaccination certificate copy ka bener jajatsüla. Vaccination tembanga magi aliba driver temi COVID-19 negative test result bener jajatsüla, koba anogo 15 atema alitsü.

f) Mozü agitsü molunga aliba driver temi parnok tenüng RTO nem agütsütsü aser parnoki Deputy Commissioner indang office nem agütsütsü.

g) Driver-i gari nung pa aser passenger tsüngta plastic barrier/sheet inoka amshira, item gari anir temi COVID-19

tendangba report bener senzütsü menüngdak.

h) Taxi/auto rickshaw stand nung nisung nungtepba aser külemi kazüba yimya mamshitsü.

i) Driver kar dak temang metaba, aketba, shirang aitba, chitetba/menemetba samaba, aser saksü-pokshi ama COVID-19 symptom lira, idangjisa isolate süa tendangtsüla.

j) Tekalen shia aliba den meputepi inyaksangshiba kar danga lira, itemji aibelenba ama züngshitsü aser Indian Penal Code indang Section 188 aser Disaster Management Act, 2005 kübok tapet temerenshi alitsü.

Item totuyuba mapa kuma inyaksü atema Regional Transport Officer, Kohima khuret asütsü aser iba totuyuba ya June 18, 2021 nü nungi tenzüka amshitsü, ta sangdong ajanga ashi.

Mokokchung nung teyari agütsüba maparen tenzü



Town Hall, Mokokchung nung June 18, 2021 nü aayanger nem teyari agütsüba sentong tenzüka mapang Deputy Commissioner, Mokokchung, Limawapang Jamir-i teyari oset agütsüba noksa nung angur.

Dimapur, Aami/June 18 (TYO): Lockdown agi kongshir timtema aliba aayanger nem teyari agütsüba maparen ka June 18, 2021 nü Deputy Commissioner, Mokokchung, Limawapang Jamir-i Town Hall, Mokokchung nung tenzütsüogo.

Ketdangürtemi ashiba agi, district kübok tesem balala nungi

iba teyari agütsütsü atema kibong 2,000 shimtet.

Item teyari oset ya District Disaster Management Authority (DDMA), Mokokchung ajanga anepalua agütsür, koba Mokokchung Town Ao Baptist Arogo (MTABA) Youth Department nungi volunteer

temi oackaging nung yaritepa liasü.

Kohima nung tang aliba Odd-Even yimya maneni amshitsü

Dimapur, Aami/June 18 (TYO): Deputy Commissioner, Kohima ajanga June 11, 2021 nü sangdonga aliba ama Kohima Municipal Council kübok Deobarnü dak alaka tanüngba anogotem nung nija garitem Odd-Even system nung maneni senzütsü melatsü, ta sangdong ka ajanga

metetdaksü.

Kohima Municipal Council kübok Odd-Even yimya nung nija garitem senzütsü anogo telemsa yamai alitsü:

Hombar, Bodhbar aser Hokulbar anogotem nung gari registration number 1, 3, 5, 7, 9 agi tembanger aliba garitem senzütsü.

Mongulbar, Brehostibar

asir Honibar anogotem nung gari registration number 0, 2, 4, 6, 8 agi tembanga aliba garitem senzütsü.

Iba totuyuba nung aibelener nem Motor Vehicles Act 1988 indang Section 177 & 179 kübok temerenshi alitsü, aser iba totuyuba ya June 30, 2021 tashi amshitsü, ta sangdong ajanga ashi.

NSCN (R) ajanga jangjashitsür

Dimapur, Aami/June 18 (TYO): Northeast Live News Channel nung osang ka nung NSCN telok temi COVID funds bushir ta sangdongba nung MLA & Advisor, School Education, KT Sukhalu-i telok 7-8 ajanga COVID funds nungi shilem kar meshir, ta ashiba atema NSCN (R) ajanga jangjashitsüogo.

Osang kaket balala nung May 25, 2021 nü NSCN (R) züngsem ajunga dang tang timtem khuret agi sünger aliba mapang asen dang aria bilemstür mesüra shishilemba dang nungia senotsü teyari memeshitsü nenshia ashiba ama NSCN (R) nokdaka lir, ta NSCN/GPRN (Reformation) indang MIP (Ministry of Information & Publicity) sangdong ka ajanga ashi.

Ochi mashir aser

tangatetba shidak malir karibo pei ajangzüksü asoshi lenmang bushia alitsü akok, aser yamalaji lira pei teloki bushisüngdangtsü atema tenüngtem (telok tenüng densema) aser danga osang tejangja temai adoktsütsüla, ta ashi.

Ozü telok nungi züngsem kari danga iba ama mapa inyakba putetra, tapet temerenshi agütsütsü.

Aser tenüng mesüra telok tejangja magütsütetra, nüburtem matsüngdang aser News media nung osang magütsüdang kanga junga tim yimya nung jangjashitsü asoshi ajak dang ajungshir, ta NSCN (R) ajangasa ashi.

Ajak den kasa, NSCN (R) ya iba tashidak wara asoshi kasa khuret abener aser mapang tajung arutsü imlaa aser sarasadema atar, ta sangdong ajangasa ashi.

Mokokchung nung Special Vaccination Drive agitsü

Dimapur, Aami/June 18 (TYO): Deputy Commissioner, Mokokchung, Limawapang Jamir ajanga sangdong ka nung, District Task Force frontline workers, health care nung inyaker, sanitation workers, commercial vehicle drivers, dokan kibur aser shishir (arishi küm 18 tema) ajak atema special COVID-19 vaccination drive ka June 19, 2021 nü District Hospital,

Mokokchung Town nung alitsü, ta metetdaksü.

Telok balala asoshi mozü agitsü mapang telemsa yamai alitsü:

1. DTF Frontline Workers, Health Care Workers, Sanitation Workers: anepdang 10:00 ako nungi.

2. Commercial Vehicle Drivers, Dokan kibur aser shishir (traders): Nikongdang 1:00 ako nungi.

Mozü agitsü asoshi tenüng

züluokba mapang tsünglanglen shia aliba document mashi ka bener arutsü akok:

1. Adhaar Card
2. Driving License
3. EPIC
4. PAN Card
5. Noksa keta aliba Pension document
6. NPR Smart Card
7. Travel Passport
8. Ration Card nung noksa den tenüng, gender aser arishi küm aliba.



Dimapur nung taoba ita May nungi Covid mozü kitem aser Covid Care Center nung inyakerter aser ano Non Medical Frontline worker-tem ajurua sarasadem mapang agia chiyongtsü lemsatepba sülen, tanü Hokolbar nüa Dimapur Area Ao Baptist Churches & Ao Civil Societies purtemi Covid mozü kitem nung Covid agi shirangertem nem teyari terara agüja sarasadem mapang agia jajaogo. Tanü parnoki Covid mozü kitem semdanga aoba mapang Dimapur nung Covid-19 agi shiranga mozü kidang amonger 79 liasü. Noksa nung Covid mozü ki ka nung inyakerter ajurua sarasadem mapang agiba angur. (Dimapur, June 18, 2021)



Union Defence Minister Rajnath Singh den Assam Chief Minister Himanta Biswa nati Guwahati nung yipden 300 aliba COVID Care Hospital semdangdang agiba noksa ka angur. (Guwahati, June 18)

Meghalaya nung tanur 5,101 dak Covid-19 putet; 17 asü

Shillong, June 18, 2021 (Agencies): Meghalaya nung arishi küm 14 ser teküpok tanur 5,000 dak Covid-19 putet aser parnok rongnungi tanur 17 asü.

Yaküm Covid-19 wara tenzükba nungi tanur 5,101 dak putet. Ajisüaka, tanur 4,344 taneptsü angu aser 17 asü, ta Health ketdangsürtemi ashi. Tanu timbaka dak tesüiba

ita ka tsüngda COVID-19 putet. "May 15 nungi tanur 2,950 dak Covid-19 putet aser iba nungi parnok 2,821 taneptsü nguogo. Külen, kasa mapang tsüngda tanur 13 tashi asü" ta ketdangsür kati ashi. Ajisüaka, tang tashi nung Meghalaya nung kinü tanur ka dak danga Covid-19 puteta mali, ta Health minister

Alexander Laloo Hek-ia ashi. Tanurtem dak Covid-19 kanga putetba atema state sorkari Shillong, Tura aser Jowai nung paediatric hospitals lapoktsü telemtetba agiogo, ta paisa metetdaksü. Meghalaya nung nisung 43,253 dak Covid putetogo aser iba nungi 38,032 taneptsü nguogo aser 758 asü. Tang nisung 4,464 anepaludar.

Manipur & Assam nung class 10 & 12 tatidang athir

Imphal/Guwahati, June 18, 2021 (Agencies): COVID-19 wara ajanga Manipur aser Assam sorkartemi class 10 aser 12 tatidangtem thiogo.

Council of Higher Education Manipur (COHSEM)-i class 10 aser Board of Secondary Education (BOSEM)-i class 12 board tatidangtem ketdangsüa agir aser Bodbarnü parnoki tatidang athiba osang metetdaksü.

"Covid-19 wara ajanga aser ano sendaka alirtemi tebilembatem ashiba nung ajemdaker High School

Leaving Certificate Examination 2021 athir" ta BOSEM-i ashi.

CBSE aser CISCE-ia Manipur nung school tem nung board examinations thiogo.

Kaketshirtem asadangsü atema state sorkari züngsem 14 agi akümba luden ka tentetogo.

Hokolbarnü Assam Education Minister Ranuj Pegu-ia High School Leaving Certificate (HSLC) aser Higher Secondary final year tatidangtem athiba osang metetdaksü.

Assam Education Department-i evaluation atema luden ana tentetsü ta ashi.

Luden kati HSLC exam indang evaluation maparen aser kati HS exam atema repranger hopta ka tsüngda osang agütsütsü.

HSLC (class 10), HS final year (class 12) aser High Madrassa indang result ji July 31 tashi nung adoktsü.

"Covid19 tensa ajanga HSLC aser HS tatidangtem magitetsü" ta taoba mapang Assam health minister Keshab Mahanta-i shia liasü.



Hokolbarnü Indian Medical Association (IMA) Doctor aser Nurse temi lungkak aitdang (GB) Govind Ballabh Pant Hospital nunga doctor aser nurse temi stethoscope aser badge tanak khaloker shilem agiba angur. (Agartala, June 18)

Assam nung BJP-i MLA 64 anioktsü meranger: Congress

Guwahati, June 18, 2021(Agencies): Bharatiya Janata Party (BJP)-i parnok den yaritepertem dak memetaloktsü atema opposition party tem nungi MLA tem anioktsü meranger aser ibanung MLA Rupjyoti Kurmi denogo, ta Assam Congress president, Ripun Bora-i ashi.

"BJP-i AGP aser UPPL dak memetaloktsü atema MLA 64 anioktsü sentong lir aser parnoki iba mapa inyaksü. Parnoki sen yong alizüktsü meranger aser Rupjyoti Kurmi-a alizükdaksü" ta pai metetdaksü.

"Kurmi-i Congress toktsüba atema jashir. Congress president ka ama aser züngsem ka ama Congress züngsem shiaji tongtipang ta ni bilemer. Congress züngsem shinga party toktsür moudaktsünür. Kurmi ya onok atema senti liasü

kechiyong pai kümsük pezü atema MLA inyaker aser ozü telok nung BJP anemer tongti rongnung pa ka liasü. Iba jagi pai party toktsür BJP nung adentsü ta onoki mebilemdangi liasü" ta Bora-isa ashi.

"Kurmi-i Congress president indang mapa melemzük, ajisüaka iba mapa ya election nung aiben takok anguba repranger magütsür. Tesüiba mapang MP aser MLA aika küm 50 tema inyaka aruaka Congress president inyaksü atemabo meshimba nguogo" ta paisa ashi.

"Kümtem süia arudang Congress-i tayongzükba aika nguogo saka item ajak nung Congress tashitaitba aküm. Taküm Assembly election nung tamakok anguba ajanga tayongzükbatem ajurur" ta Assam Congress president-isa metetdaksü.



Assam Legislative Assembly nung Mariani Assembly Constituency nungi Congress MLA, Rupjyoti Kurmi-i Assam Assembly (ALA) Speaker Biswajit Daimary nem resignation letter agütsüdang agiba noksa angur. (Guwahati, June 18)

Dibrugarh nung ano taila doctor ka putet

Dibrugarh, June 18, 2021 (Agencies): Assam kübok Dibrugarh district nung aliba tea estate ka nung taila doctor ka ano putetogo.

Iba nisung yagi Dr Hirak Das tenüing amer Mancotta Tea Estate nung mapa inyaka aru.

Dr Hirak Das ya tang Gauhati Medical College and Hospital (GMCH) nung Anatomy indang assistant professor ka ama teinyakdak lir.

Tea Estate ka nung pa tenüing amshir ta metetba sülen Dr Hirak Das-i June 16 nü Dibrugarh Police nung FIR ka agütsü.

Ajisüaka, police-i mapu tsüngda iba taila doctor jena ao.

"Taila doctor jena ogo saka onoki pa yakta aputsü. Onoki pa indang maitüsü jangjatsü meranger aser bushisüingdang südar" ta Dibrugarh police station officer in-charge, Rajib Saikia-i ashi.

Dibrugarh district nung tan ita tsüngda tea garden balala nung taila doctor asem tashi putetogo. June 3 nü Simon Nag ta ser

nisung ka Mokalbari tea estate nung medical officer inyakba putet.

Nag yagi Dr Stephen Anthony indang maitüsü amshia inyaka aru. Dr Stephen ya Bangalore nungi lir aser pa tang Singapore nung mapa inyaker.

Ano, June 5 nü police-i Eyaqub Ali ta ser Hatiali tea estate nung medical officer inyaker ka apu.

Ali yagi JSB Civil Hospital, Kajalgaon nung obstetrics & gynaecology specialist Dr Eyaqub Ali Ahmed maitüsü amshia inyaker.

"Onoki ken o jungjunga bushisüingdang südar" ta Dibrugarh SP Shwetank Mishra-i ashi.

"Assam Chah Mazdoor Sangh (ACMS) lennirtemi Guwahati nung State labour and welfare minister Sanjay Kishan den ajurutepa iba ken o lemsatepogo" ta vice president Nabin Keot-i ashi.

"Doctor dang masü saka Assam nung aliba tea estate ajak nung nurse aser pharmacist tem jangjatsüla" ta Keot-isa ashi.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI (JUNE) 19, 2021

Rupee aser Dollar

- Tangsen Lemtur

June 18, 2021 nü India nunger sen 'rupee' aser US sen 'dollar' medemdangra dollar sen 1 ji India nunger senbo 74.16 kümogo; iba ya osang tajung ka masü kechiyong India nunger sen rupee jenjang tamajungba akümba ajanga bendanglen nungi alizükba osettsüset, talisa totzü jenjang ano tang dang nungi tasakba akümtsü, kechiyong India-i linük nung nungdakba gari totzü shilem 80 shibo bendanglen nungi dang alizüker. Ibayongji tang India nung petrol aser diesel jenjang tujen atur, aser totzü jenjang atuba ajanga ajanga aonsotsü aser osettsüset jenjang tasakba akümer. Tang India nung Union Territory ka aser state trok nungbo petrol litre ka nung sen 100 dak tema kümogo. June 17 nü Parliament Standing Committee on Petroleum & Natural Gas senden nung sorkar dang linük nung totzü jenjang tupet atuba kuli asüngdangba langzudang Ministry of Petroleum nungi ketdangsertemi, linük nung totzü jenjang atuba ya India nunger sen 'rupee' jenjang tamajungba akümba aser sorkari petroleum products nung saru tali atuba ajanga lir, ta metetdaksü. Iba ya alima nung India nunger sen tapuba akümba ajanga lir ta asenoki angajemer. Küm 10 tejaklen (2011 April) Centre nung taoba mapang UPA sorkar alidang dollar 1 ji India nunger sen 44.17 liasü saka tanübo dollar 1 ji India nunger sen 74.16 kümogo. Yamaji India nunger sen jenjang tapuba-tapuba akümba agi tanga linüktem nungi sen ishikati oset alia bener arubato India tongerbo sen aika agi alir; tetezü, tangalen sen dollar 100 agi phone ka ali nung India nungbo kasa phone ji sen 7,400 agi alitsü. Tanü takar linüktem den India rongsenkettsüng medemdangdang India nunger sen jenjang tamajungba akümbaji sensakertem asoshi shisabulutsü onük ka lir. 2016 küm Centre sorkari demonetization benokba, 2017 küm GST benokba aser 2020 küm nungi coronavirus wara ajanga India nunger rongsenkettsüng jenjang tamajungba akümer, aser tang linük rongsenkettsüng asentenshitsü merangba mapang nung rupee jenjang ano tamajungba akümer. Rupee jenjang tajemba akümba azüoktsü atema bendangleni osettsüset yokba jenjang asüngsashitsüla, ajisüaka tang India nunger iba jenjang ka nungji mali. International markets nung tanger den tokteptsüsa India nung osettsüset meyangluteter. Ano kuli rongnung kaji shishilembaba 'trade deficit' (bendanglen ayokba dang nungibo bendanglen nungi alizükba timba) jenjang majungba ajanga lir, anungji sorkari mapatong tasen benoka inyaksü nungdaker. Opposition nung alidang Ato kilonser Narendra Modi-i rupee jenjang tajemba akümba aser petrol/diesel jenjang atuba anema sorkar aiben aija aruogo, ajisüaka pa yimsüsüba kübok tang mezüng India nung petrol litre ka nung sen 100 dak tema ajunger aser rupee jenjang tamajungba akümer. India nunger rongsenkettsüng jenjang ano tamajungba akümtsüa akok, totzü jenjang tupet atutsü, osettsüset jenjang tupet atutsü aser rupee jenjang tamajungba akümtsüa akok; iba atemaji sorkar dak alaka asenoki kecha mesayangtettsü, saka asenoki inyaksü akokba kaji, sen apayua amshidi.

OLEMSABANG

Naga Lima nung Tzüngsarosa Tebilemstsü: Mokokchung District Teinyaktsü

- Tiatoshi Longkümer, Kohima

Taküm tzünglu tsüngküm mapang tongja tongaka tzünglu junga mesüra kheni maruba ya Naga nübur ajak asoshi tebilemstsü tulu lir. Yashi (dt. 17th June 21) osang shiti aika nung Nagaland government-i tang tashi nung Naga lima nung tzünglu koda arur mesüra marur ibaji asadanger asenok nem metetdaksüogo. Atangji, Mon district dak alaka districts ter prongla nung tzünglu junga marur aser tesem kar nungbo taoba mapang dang nungi kangasa achemba ajanga alima akonger.

Nagaland nung tzünglu-mepong asadangerteri ashiba nungji, Mon district-bo tang tashi nung 48% agi taoba mapang dang nungi tajungba tzünglu arur. Ano asenok Mokokchung aser Longleng distirct-a kanga majungbo masü. Asen Mokokchung district ya -6% agi dang tchemba aser Longleng-ji -11% agi tchemba tzünglu tzü angur. Aser item yabo tzünglu-mepong asadangerteri asoshibo "normal" dang lir ta ashir. Saka Naga lima nung nütsüng yongsük kanga longsoa alidang districts, Dimapur aser Kohima ama nung tang tashi nung tzünglu arubaji kangasa achema arur. Dimapur district nung tzünglu maruba achembaji -66% lir aser Kohima nung -47% lir. Item yabo joko serious tensa tem lir, aser yamai dang ita ishika ora asenok meimchir aser taküm aliba osettem tia aser jenjang kanga majungtsü.

Nagaland nung tzünglu tarutiba townji Kohima liasü. Saka joko taoba küm ishika tzünglu junga maruba meteter. Aser taküm kümsa tamajungba akümer. Joko ya June ita talangba arur saka tang tashi tzü alia ajemer (2000 lits@ 1200/-). Sen agi alitsü ang süng aiben kanga rakteper kechiyong ayong nung tzü mayimer, mesüra tzüpu (ring well) nung tzü mait. Anungji Kohima town anasabo tzü ayokertem tzü atadak makai akümer. Kesaji ni bilem nung Dimapur nunga tesem aika nung tajemtsü tzü agi timtimya alitsü. Tanü asüngbo dimapur nung joko company tzü ayokba dang alia ajemer amai ni angur.

Kohima nung Angami youth organization-i joko ali perepa ir tzü atsütetsü memelar (water drilling or water pump). Kechiaser tesem aika nung tzü ali telong nungi machine agi atsütetba ajanga süngdong aika tera agi tzü metongteti asür. Ano alu aser atsü nung ali nung tzü maitba agi tsünü-senpongtsü memeir. Atangji, alibo tajung saka ali nung tzü maitba tesem aika akümer. Ali nung tzü maitba tongtipang khuli kaji, joko asen lima towntem nungbo tesem teimba ka cement agi ki yanglur aser tawa ajak cement agi menokbang adoker. Kari senzütsü lenmangtema black topping agi aibangatoker aser tanungba ali tesemtemji cement agi menokbangogo. Aji asünung, tzünglu aruakasa, ali telongi tzü aidak maka, tzü ajak ayong nung dang yimoker aser tzüma lenden leni yima luadoker.

Asenok tebang nung pangbet küma modern development aser technological development indang jembir dang ashi, mekümdangra modern development jagi asenok taküm alitsü mejungi tepsettsü aser asen lima ya tuluba ka yakta lisem lima akümtsü. Modern development tangatetba ya cement agi yangerba ki, mokozi longa senzuba kari tekara aser tulu, black topping agi tepbangba lenmang aser kima, aser mobile phone ajanga sen benshitetba aser oset alitetba indang ya dang bilem nungbo, asenok item ajakji amer alima nung talidak makatsü. "Cement ki aser lenmang mentality" nung dangbo asenok modern development mebilemstsüla aser meinyaktsüla.

Küm anaboba joko coronavirus ajanga alima ajonga shibanger tim teinyaktsü meinyaketetba ajanga alima nung chiyongtsü achemer aser mapa mangur. Talisa, lockdown ajanga India lima nung aser asen Naga lima nunga aluyimertem kanga kongshio. Aser kodang aluyimer aser parnok alu nung timtim adokdir, asenok anüng tom nung dang yimzüerjia dena ayatsü. Covid-19 lockdown timtim den ano tzünglu anüng nungi maruba densa ajururji, item tensa ana ya junga ajuruteptetra asenok ajak asoshi kangsa tebilemstsü tulu asütsü. Tanü tzünglu maruba agi tzü tajemtsü manguba indang jembir, asüngbo tzü tajemtsü dang masü saka onpo nung jang aser aon asotsü kecha makatsü. Iba dangji "aya-wara" ta ajatsü. Idangjibo nisungi nisung tepseta chira aya matemtsü. Asenok tang nungi kanga sarasadema, aser shisaka meranga inyaksü nungdaker.

Nagaland nung tesem teimba ka nung tzünglu tzü mangudang Tsüngrem taochi agi Mokokchung aser Mon distirct nungbo tzünglu tzü moatsüdarji, asenok item district nung alirtemi tang ya shisaka inyaksü kanga nungdaka lir. Shibai metet alimaji yamaisa ora, tzünglu aruba district-tem jagi ang nisungtem sendentsü aser chiyongtsü bushii arutsü. Tang ya asen Aoertemi aluyimba mapa merang inyakra, aser tsünü-senpongtsütem pei tzüngküm den apet yokra, itemji asen Aolima atema dang masü saka Naga lima tesema aika tongzüktetsü. Shidi süra, Dimapur aser Kohima town nung Peren aser Wokha districts nungi sungolio aser ango bener aruba agi perir. Aser yamaji yimtsüng nung dang alir süaka aluyimertem town nung alir dang nungi takarba aika lir. Saka taküm tzüngsa rosa yamai dang ora, Peren aser Wokha district aser Pfutesro nungi akhi ama chiyongtsü mangutsü. Idangji, Mokokchung aser Mon aser Longleng districts nungi adokba chiyongtsü tasen jagi item town-tem mesütsüla aser yamaji asen nürtema rongsen-ketsüng nunga takaba akümtsü.

Mokokchung district rongsen-ketsüng nung renloktsübjaji, yangji telidak nüburtemi dang inyaksüba masü, saka iba district nung soa-intetba Aoer-Aotsür aser tanga sensotem ajak külem khuret lir. Kohima aser Dimapur nung Aoer aser Mokokchung town nung soa-inteter senso tajung aika ali rongsen nung aser shisatsü nung takar aika lir. Mapa nung anisüngzük agir alitema aser ano tang teinyakdak ain-tashi aketer-a jenti lir. Anungji, tang district nung telidak nüburtem den rongsen aser shisa akar nübutem longjemer, asen lima nung mapa meranga inyakba ajanga rongsen-ketsüng nung ajungkettsü merangtepedi. Kin-kitong aser election otsü ya masü, saka ali rongsen aser aluyimba mapa nungya Aoer ajak longjemer yimten aser arogoi anir küm 10 danga tang dang nungi tali temerangba inyak nungbo memeteti asen lima aintsü. Rongsen-ketsüng dang renoktsüba masü, saka tesayur balaka meliaka asen mentality aser spirituality dena temaba jenjang nung aintsü.

Alima nung meimchir tia aser alima tensa ajak melentepa dang arur aser aoer. Saka tensa tia tajungba küma azüokba aser yanglushitsübjaji tongtipang ana lir: shisa kaa sendong atongba aser meranga inyakba. Taküm tsüngsarosa tia nung ya ajemdaker asen Aoertemi ali nung, ayong nung, aser arem nung shisa kaa sendong atongtsü aser ano tali meranga inyaksü mulungtet nungbo koda temoatsü asütsü. Kar asoshi tebilemstsü amai asübjaji kar asoshibo temoatsü tasen-a akümtsü akok.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Yimsü lenirtem Vatican nung climate change senden amentsü



Taoba mapang Myanmar kubok Yangon nung tamangba yimsü balala nungi lenirtem climate change atema senden amenba sülen Pope Francis-i tamangba yimsü balala nungi lenir 17 den külemi tangokba noksa ka yangi angur.

June 18, 2021: Taküm October 4 nü alima nung tamangba yimsü balala nungi lenirtem Vatican nung senden ka mena climate change dak sendakba telemetba kar agia sangdong ka renemtsü, ta osang k ajanga metetdaksü.

Taküm November ita nung alima nung sorkar lenirtem climate change atema Scotland nung COP26 (UN climate summit) senden amenba mapang nung October 4 nü yimsü lenirtem renemba sangdong metetdaksü.

Taküm February ita nungi tenzüka tang tashi nung Holy See kubok British aser Italy embassy temi senden trokben ayongzüka menogo, aser item senden nung alima nung yimsü balala nungi lenir 40 aser climate scientist 10 shilem agia aden.

"Lenirtemi peipei yimsü nung ajemdaker climate change dak sendakba tangatetba balala

lemsatepa liasü, aser meimchirtemi Tsüngremi yangluba lima tajungba angateta tajungtiba nung anepalutsü atema bangjema liasü, aser scientist temia parnok research agiba osang tasentiba lemsatepa liasü," ta tawa British ambassador to the Holy See, Sally Axworthy-i sangdong ka ajanga metetdaksü.

Vatican foreign minister, putir Paul Gallagher-i item senden ajak nung shilem agia denogo; June 17 nü osangbenertem den jembidang pai, October ita nung ayongzüka senden nungji Pope Francis-a adentsü akok, saka November ita nung Glasgow nung ayongzüka COP26 senden nungbo Francis adentsü asü madentsüar mejangja, ta metetdaksü.

Video conferencing ajanga yimsü lenirtem den senden amenba mapang nung Sally Axworthy-i, "Tangatetba balala

aika lemsatepa onük kar külemi bangjemogo. Tamangba yimsü ajaki alima ya temeshi ta züngshir aser alima kümzüka ayutsüji meimchirtem teinyaktsü khuret lir ta tangatetba lir," ta metetdaksü.

Laisa, "Climate change amokmeren atema asenoki rongdak süa inyaktsüla," ta ashi.

October ita nung ayongzüka senden nungji shirnoksa adentsüar tang tashi nungbo mejangja, saka senden ayongzükeremi alima nung tongtibang yimsü balala nungi lenirtem aser alima tesem balala nungi yimsü lenirtem dendaktsüner.

Gallagher-i, linük aikati secular asütsü atema meranger aser alima nung nütsüng timbaka atema tamangba yimsü ya tongtibang ta züngshir; sorkar lenirtemia tamangba yimsü ajanga loktiliba nung temelenshi adokdaksüba jangjaogo, ta ashi.

Caritas Korea-i Ghana nung mapa manguba lanurtem yarir

June 18, 2021: Khristan charity telok- Caritas Korean branch-i Ghana linük nung lanurtem, talisa tetsürtem mapa manguba tebilemstü bentettsü atema inyakdar.

Caritas Korean branch-i Ghana nung aliba parnok agency- Caritas Ghana nem US sen 54,000 dak tema agütsüogo. Africa nung aliba Ghana linük nung lanurtem mapa manguba shilem 12 aser mapa inyakyonga taa shidak manguba shilem 50 dak tema lir.

June 16, 2021 nü video conferencing ajanga partnership tenzüka sentong nung jembidang putir Joseph Osei-Bonsu-i Caritas Korea dang pelaba lemsatep.

Joseph-i, "Ghana nung tayongzüka tulu rongnung lanurtem mapa manguba tebilemstü ya densema lir, aser coronavirus wara prok tenzüka sülen ano tamajungba

kümogo. Informal sector nung mapa inyaker lanurtem aika mapa makai kümogo, aser business jenjang tamajungba akümba agi lanurtem aika mapa makai kümogo," ta metetdaksü.

Caritas Korea nung executive director, putir Paul Sunghun Choo-i, "Lanurtem dak teimla aser mangdang alitsüla. Parnok ajaki parnok teimla aser mangdang ataloktsü atema inyaker. Ajisüaka tang ama tensa ka nung parnok taküm alitsü merangdang parnok teimla aser mangdang amadoker, talisa wara mapang nung parnok teimla aser mangdang samadar," ta ashi.

2019 küm senden ka nung Ghana linük nung putirtemi linük nung lanurtem mapa manguba tebilemstü tamajungba akümba lemsatepa liasü.

Paul-isa, "Caritas-i parnok nem sen agütsüba dang masü

saka Ghana nung lanurtem nungita yariner, koba ajanga lanurtem mangdang atalokba nung yaritsü," ta metetdaksü.

Pax Garment nung putir, Osei-Bonsu-ia, Caritas teyari ajanga parnoka tajangzüker angur aser parnok lanur tetsürtem nem süoshi arrba skill training agütsür, ta metetdaksü.

Ano Caritas ajanga tajangzüker angurtem rongnung Tamale Arogo densema lir. Mapa makaba ajanga yimitem toktsür aoer lanurtem Arogoi ajungshia mapa inyakdaksüdar.

2019 küm senden ka nung Ghana nung putirtemi linük nung lanurtem mapa manguba tebilemstü tuluba akümba tebilemstü lemsatepa liasü; lanurtem mapa maangka manguba ya security tsütsü amokmeren ka lir, anungji iba tebilemstü atema asenoki rongdak süa inyaktsüla, ta bangjema liasü.

ANO GO ABEN TSÜNGREM DEN

Shisatebulu, tenüng sangang

Kecha nung temulung tatema saka ajak nung sarasademba aser temepishiba aser tenüngsang agi nenoki mepishiba Tsüngrem metetdakjang.

Filipi 4:6.

Mathi 6 nung Yisui tenem nung sayutsüngiba mapang nübur dang shisamebulutsü ashi. Kechi achitsü mesüra kechi abentsü shisa tebulu. Nenok taküm asoshi shisa tebulu. Asüng asoshi shisa tebulu. Idangji Yisui ashi, parnok kotaker Tebui parnok nungdak ajak agütsütsü ta ashi. Pauli ibai tatsü kuma tejangja ratetta ashi. Kecha nung temulung makai teli! Ne mapa asoshi shisa tebulu; ne temang asoshi shisa tebulu; rongsen atema shisa tebulu. Kechiba? Shisabuluji temenen ka lir aser ibai ammingba den mesüktepa lir. Kodang shisabuludir iba jagi Tsüngrem dak tamang makaba sayur. Tsüngremi alushihak anebalur aser arem naro nem abendaktsür süra shirnoki Pa meimer parnok nem sempet tajung magütsütsüa ma? (Mathi 7:11).

Shisabolui ne temang raksatsür, ne tebilembatem chimatsür, tangar den libaliro nung timtemdaktsütsü aser ne tamang ilaa kümdaktsütsü. Anungji Pauli iba nung ne taküm koda alitsü maneni ashir. Kodang ne dangi shisabulu arudir aji metettang, anenang aser sarasademang. Na shisamebulur saka iba tia nung nai Tsüngrem dak amanger ta Pa nem metetdakjang. Ne nungdak Pa dang shiang aser tenüngsang agüjang. Pai tabensa sempet tajung agüja kar. Pai ne nem par jabaso agütsü aser ne shisabulu toktsüdang Pai ne nem masadangtetba tesünep agütsütsü (t.7).

Tsüngrem, ni iba mazüngi aliba taküm ajanga jajadang, anogo shia Ne dak amangtsü yariang kechiaser Nai ajak azüoker.

Tamil Nadu nung Pastor aser pa kinüngtsü na dak azük

June 18, 2021: June 13, 2021 nü Tamil Nadu kubok Salem District nung aliba Omega Arogo Tenla kidang Amongnü tekülem sentong agiba sülen Rashtriya Swayamsevak Sangh (RSS) nungi züngsem ana-Manibannan aser Nagaraj na den mejangjaba nisung anati sentep kima pastor Jeevanandam aser pa kinüngtsü na ajurua liasü.

Kobi melii Manibannan-i Tenla ki kakkok aser Pastor Jeevanandam dak azükba ajanga tensa tamajungba aküm. Manibannan densema Hindu nung parnok pezüi Pastor Jeevanandam tola semzüksüba

June 13, 2021 nü Tamil Nadu kubok Salem District nung aliba Omega Arogo Tenla kidang Amongnü tekülem sentong agiba sülen Rashtriya Swayamsevak Sangh (RSS) nungi züngsem ana-Manibannan aser Nagaraj na den mejangjaba nisung anati sentep kima pastor Jeevanandam aser pa kinüngtsü na ajurua liasü.

Iba tesem nungji alirtemi ashiba agi, Hindu yimsü alia amangertemi Tenla ki ka shibangdaksütsü meranga pastor aser pa kinüngtsü na dak azük.

June 13, 2021 nü Tamil Nadu kubok Salem District nung aliba Omega Arogo Tenla kidang Amongnü tekülem sentong agiba sülen Rashtriya Swayamsevak Sangh (RSS) nungi züngsem ana-Manibannan aser Nagaraj na den mejangjaba nisung anati sentep kima pastor Jeevanandam aser pa kinüngtsü na ajurua liasü.

Kubi melii Manibannan-i Tenla ki kakkok aser Pastor Jeevanandam dak azükba ajanga tensa tamajungba aküm. Manibannan densema Hindu nung parnok pezüi Pastor Jeevanandam tola semzüksüba

sülen pa dak maneni azük. Iba nü India kubok Tamil Nadu state nung Hindu yimsü alia amangertemi pastor ka aser pa kinüngtsü na dak azük; pastor kinüngtsübo tang mashisa lir, ta International Christian Concern (ICC)-i metetdaksü.

International Christian Concern (ICC)-i metetdaksü. Iba tesem nungji alirtemi ashiba agi, Hindu yimsü alia amangertemi Tenla ki ka shibangdaksütsü meranga pastor aser pa kinüngtsü na dak azük.

June 13, 2021 nü Tamil Nadu kubok Salem District nung aliba Omega Arogo Tenla kidang Amongnü tekülem sentong agiba sülen Rashtriya Swayamsevak Sangh (RSS) nungi züngsem ana-Manibannan aser Nagaraj na den mejangjaba nisung anati sentep kima pastor Jeevanandam aser pa kinüngtsü na ajurua liasü.

International Christian Concern (ICC) den jembidang pastor-i, "Kü kinüngtsü dak azük saka la dak tema zübobu mali ajisüaka la dak-a mejungi azük. Kü kinüngtsü ita 9buba mashisa lir, saka la dak-a azükba ajanga ni kanga aoksa liasü. Ajisüaka Tsüngremi tamajungba nungibo kümzükgogo, aser tangbo la temang lendong nungi jenbuogo," ta metetdaksü.

Pastor Jeevanandam ya tesüba küm pezü tashi Omega Arogo nung pastor inyaker aser iba Tenla kidangi Khristan züngsem 30 arur.

Tamalen-a RSS züngsemtemi pastor aser kinüngtsü na dang Omega Tenla ki shibangang, aser yimdak Khristan ka danga malitsüla, ta amokmerena liasü. Pastor Jeevanandam-i Manibannan aser Nagaraju na anema ken o ka benokba sülen police-i tenaprongla pua tepuokdak yuogo.



June 18, 2021 nü India linük tesem ajaklen Indian Medical Association (IMA)-i longkak aita sorkar dang doctor tem kümzüksü atema central özüng ka yangluang ta takhangba agütsüba anogo nung Bihar yimtiba, Patna nunga doctor temi longkak aitba noksa nung angur. Hokolbarnü India nung IMA doctor lakh 3.5 dak temai shilem agia longkak aitogo.

October ita nung Covid wave atema India-i renema alitsüla

Bengaluru, Aami/June 18 (Agencies): Taküm October ita nung coronavirus wave tasembuba agi India linük kongshitsüa akok, ajisüaka tamalen dang nung tang tajungba iba wara ya azüoktettsü imlar; iba wara ya ano küm ka shi maneni alitsü, ta health tsütsü mongintemi ashiba Reuters poll ajanga metetdaksü.

June 3 nungi tenzüka June 17 tashi nung iba survey agia liasü aser survey nung alima tesem balala nungi healthcare specialists, doctor tem, scientist tem, virologist tem, epidemiologist tem aser professor 40-i shilem agia liasü.

Iba survey nung shilem agir shilem 85-i, October ita nung coronavirus wave tesembuba agi India kongshitsüa akok, ta ashi; parnok aseme August ita nung aser parnok 12-i September ita nung coronavirus wave tasembuba tenzüksüa akok, ta ashi.

Shilem agir tanungba asemibo coronavirus wave tasembubaji November ita nungi sangküm February tsüngda tenzüksü, ta ashi.

Survey nung telangzüba

agütsür shilem 70 (34 nungi parnok 24)-i, coronavirus wave tanabuba dang nungibo tasembuba wave tajungba azüoktettsü, kechiyong tanabuba wave mapang nung vaccines, mozü, oxygen aser hospital nung yipten agi kanga anünga liasü, ta ashi.

All India Institute Of Medical Sciences (AIIMS) nung Director, Dr Randeep Guleria-i, "Taruba wave tajungba azüoktettsü, kechiyong vaccinations ajanga iba tashidak ishiba putettsü," ta ashi.

Tang tashi nung India nung coronavirus vaccine agitsü temsüa aliba nütsüng million 950 nungi nütsüng shilem 5 shi nem dang vaccine dose anaprong agütsüogo, anungji iba wara ano prokra nisung aika wara nungi mejenbuttsü.

Survey nung shilem agir timbakati, tang India nung vaccination drive ya taküm küm tatembanglen tashi nungbo tajungba akümtsü, ajisüaka wara anema tenokdangbatem mapang matongdang kera magientsüla, ta ashi.

Coronavirus wave tasembuba mapang nung arrshi

küm 18 tekübok tanurtem mejungi kongshitsü asü, ta asüngdangba telangzüba agütsür 40 nungi parnok 26-i, hau ta langzü.

National Institute of Mental Health & Neurosciences (NIMHANS) kübok epidemiology department nung tongti, Dr Pradeep Banandur-i, "Vaccine magiba nütsüngji parnok (arrshi küm 18 tekübokpurtem) lir aser tang parnok atema vaccine mali, anungji tasembuba wave mapang nung tanurtem mejungi kongshitsü," ta metetdaksü.

Karnataka state sorkar advisor aser Narayana Health nung cardiologist, Dr Devi Shetty-i, "Tanur aika dak iba tashidak menara ajungbena nenoki kecha mesütettsü, kechiyong asenok iba atemaji renema mali," ta metetdaksü.

Dr Devi Shetty-isa, "Iba ya linük atema khuret khenyongi balaka asütsü. Hospital tem nung paediatric intensive care unit yipten ishika dang lir, anungji tanur aika dak iba tashidak menara asenok atema lendong tulu asütsü," ta metetdaksü.

(Maneni tapak 10 nung...)



New Delhi, June 18, 2021: Hokolbarnü New Delhi nung Jammu & Kashmir nung terenlok mapatem inyakba asadangba senden nung Union Home Minister Amit Shah, Jammu & Kashmir Lt. Gov. Manoj Sinha aser tongti ketdangsertem tangokba noksa nung angur.

Bengaluru yimti nunga Petrol totzü litre ka nung sen 100 jungogo

Bengaluru, June 18 (Agencies): Hokolbarnü India nung gari totzü jenjang maneni atuba sülen tang mezüng Bengaluru nunga Petrol litre ka nung sen 100 jungogo.

Hokolbarnü linük nung totzü company temi petrol litre ka nung poisa 26 aser diesel litre ka nung poisa 30 tuogo.

India linük nung yimti aika nung petrol litre ka nung sen 100 jungogo aser Hokolbarnü Karnataka yimtiba, Bengaluru nunga petrol litre ka nung sen 100 ajunger. Tang Bengaluru yimti nung petrol totzü litre ka nung sen 100.17 aser diesel litre ka nung sen 92.97 kümogo.

Taküm January ita nung Bengaluru nung petrol litre ka nung sen 86.47 dang liasü saka tesüiba ita trok tsüngda petrol litre ka nung sen 14 shi atuba sülen Bengaluru nung petrol litre ka nung sen 100 ajunger.

Tawa Hyderabad nunga petrol litre ka nung sen 100 ajung. Bhopal nungbo petrol litre ka nung sen 104.53 jungogo aser iba ya India kübok yimitem nung petrol jenjang tasakba agi ayokba yimti lir.

Tang Delhi nung petrol litre

ka nung sen 96.93 aser diesel litre ka nung sen 87.69 agi ayoker.

Brihostibanü Parliament Standing Committee on Petroleum & Natural Gas Affairs senden mena linük nung gari totzü jenjang maneni atuba tebilemtsü onük lemsatapa liasü.

Parliament Standing Committee Chairman, Ramesh Biduri leniba nung amenba senden nung MP temi totzü jenjang maneni atuba onük süoka totzü jenjang atuba azüoktsü atema sorkari kechi inyakdar, ta asüngdanga liasü.

Iba senden nung Petroleum Secretary Tarun Kapoor, Ministry of Petroleum nungi ketdangsertem aser IOC, BPCL, HPCL nungi tongti ketdangsertem aden.

Ta s ü n g d a n g b a t e m langzüdang Ministry of Petroleum nungi ketdangsertemi, linük nung totzü jenjang atuba ya international crude oil jenjang melenshiba den sendaktepa lir, iba denji külemi India nunger sen 'rupee' jenjang tamajungba akümba aser sorkari petroleum products nung saru tali atuba ajanga lir, ta metetdakja liasü.



June 18, 2021 nü Hyderabad nung aliba Iran nungertemi Iran Consulate Banjara Hills, Hyderabad nung Iran Tir election atema votes agütsüba noksa nung angur.

India nung ano nisung 62,480 dak Covid putet aser 1,587 asü

New Delhi, June 18 (Agencies): Tesüiba ghonda 24 tsüngda India nung ano nisung 62,480 dak coronavirus putetba sülen linük nung tang tashi nungbo nisung ajak agi 29,762,793 dak iba tashidak putetogo, ta Hokolbarnep 9:00 ako nung Union health ministry-i metetdaksü.

Tanü agi anogo 11buba linük nung anogo shia nisung lakh 1 den tajemba dak iba tashidak puteta arudar; Brihostibarnü nisung 67,208 dak dang iba tashidak puteta liasü.

Ita ana tashi anogo shia coronavirus tashidak agi nisung 2,000 dak tema süa aruogo aser tang mezüng anogo ka nung iba tashidak agi nisung 2,000 den tajemba süogo, kechiyong tesüiba ghonda 24 tsüngda linük nung coronavirus agi shiranger 1,587 dang asü.

Tang tashi nung India nung coronavirus tashidak agi nisung 3,83,490 süogo.

Tang linük nung coronavirus

agi teshirangdakpur 7,98,656 dang kümogo; tesüiba anogo 73 tashi linük nung iba tashidak agi teshirangdakpur lakh 8 dak tema liasü.

Tesüiba ghonda 24 tsüngda India nung coronavirus agi shiranger 88, 977 anepogo aser tanü agi anogo 36buba anogo shia iba tashidak agi shirangertem anepba dang nungibo iba tashidak putetba tajemba, ta Health Ministry-isa metetdaksü.

Tang anogo shia iba tashidak positive putetba shilem 3.24 dang kümogo aser tesüiba anogo 11 tashi iba tashidak positive putetba shilem 5 den tajemba lir.

June 17 tashi nung linük nung samples 38,7167,696 tendanogo aser iba nungji Brihostibarnü samples 19,29,476 tendangba densema lir, ta Hokolbarnü Indian Council of Medical Research (ICMR)-i metetdaksü.

India nung tang tashi nung coronavirus vaccine dose crore 26.89 dak tema agütsüogo.

Nigeria nung school tanur 80 pua bener ao

Abuja, Aami/June 18 (Agencies): Nigeria northwest tsütsü Kebbi state nung prangbong bena alirtemi police ka tepset aser kaketshir 80 den tesayur pongu pua bener ao, ta police, yangji alir aser tesayurtemi ashi.

Iba lendong ya Kebbi state tezülen Birnin Yauri jila nung aliba Federal Government College nung Brehostibarnü ataloka liasü. Nigeria nung prangbong bena alir telok balalai ita ka majungdang school aser college nung timtem agütsüba tan agi asemen buba alitsü, aser bandits temi pua bener aor alangzüksü asoshi sen meshitsü mechi inyaker, ta ketdangsürtemi ashir.

Prangbong bena alirtemi kaketshir 80 dak tema pua bener ao, aser parnok ya timba tetsürtem lir, ta iba school nung tesayur Usman Aliyu-i ashi.

"Parnoki police ka tepset, kishi kakkoka kaketshir class agidaki indang indanga ao," ta pai osangbener dang ashi.

Kebbi State nung police atema odongtar Nafiu Abubakar-i ashiba agi, police aser lendong agütsür tsünga khatepba mapang police ka khaset aser kaketshir ka dak khashia tang temang anepaluba mapang lir.

Security forces temi anasa aliba arem nung pua bener aoba kaketshir aser tesayur tem bushir, ta pai ashi.

Police temi kaketshir samar aliba indang osang tejangja memetdaksü aser Kebbi state governor indang odongtari samar alirtem züngdangba mapang lir, ta ashi.

Khatepba anener mapang tatsüka lir school kidangi aosang Atiku Aboki-i osangbener dang ashiba agi, school kidang nisungtem tetsübu nung bulutepa pei tanurtem bushia liasü.

"Onok aodang kaketshirtem aser tesayurtem jepa liasü aser kari parnok mesüzüka liasü. Ajak mangmangtepa liasü. Iba mapang kü adianui küdang par tanur ana mangur ta ashi aser parnok ya pua bener aor rongnung dena ali asü maliar onoki memetet," ta pai telephone ajanga osangbener dang ashi.


Nok-o-nü peria bener mapa tamajung inyaker telok, shirnok dang parnoki bandits ta ajar, item teloktem yagi mapang talangka nungi central aser northwestern state tem nung tenük yoka yimtsüng tem amaker, kiset shiruru auyar aser senotsü mechitsü mechi nisungtem pua bener aor.

Saka tang parnoki school nung tali tenük yoker, kaketshirtem pua arem leni bener aor aser parnok alangzüksü atema sen meshir.

Taoba küm December ita nungi tang tashinung item telok yaki tanur aser kaketshir 700 dak tema senotsü meshitsü mechi pua bener ogo.

May ita tatemlena prangbong bena alirtemi Nigeria central tsütsü Niger state nungi tanur 136 pua bener oa liasü.

Iba ama lokti pua bener aoba ya Tir Muhammadu Buhari indang security forces asoshi khuret tulutiba lir aser parnok ya linük northeast aser southeast tsütsüa telungpur telok balala den raraba mapang lir.



Amman, Jordan nung Jordan Foreign Minister Ayman Safadi (achichi) aser Luxembourg Minister for Foreign and European Affairs Jean Asselborn na June 17, 2021 nü osangbener senden ka nung adenba noksa nung angur. Palestine dak sendakba nung linük ana tsünga nungdaka aliba yimjung ken o tanaben jemi tenzüksüla, ta Jordan-i Brehostibarnü ashi. Linük ana yagi Israel dang ki-o-jen yangluba amala maparen anentsü ayongzuka liasü.

By-election ka nung British PM Boris Johnson teloki takok mongutet

London, Aami/June 18 (Agencies): London tezülen British Ato Kilonser Boris Johnson indang constituency nungi mile ishika pilar parliamentary by-election agiba nung par Conservative Party tamakok ajurua liasü.

Conservatives ya 1974 küm tentetba sülen Chesham and Amersham constituency nungya election agi shia vote shilem 50 dak tema ngua aru.

Ajisüaka taoksatsüka European Union busemba centrist party, Liberal Democrats nungi candidate kati Conservative candidate dang vote 8,028 timba ngutet, koba Hokulbarnepe sangdonga liasü.

Iba election result indang asüngdangba mapang, "Ibai

tasak aser tejashitsü ka lir. Onoki iba dang nungi tajungba imlaa liasü," ta junior interior minister Kit Malthouse-i ashi.

Taoba ita northeast England kübok Hartlepool nung Britain indang opposition Labour Party tashi ita alidak Conservative Party-i takok ngua liasü, aser ibai Brexit maka kuma inyakba ajanga lir, ta Johnson-i shia liasü.

Saka Brexit maparen ya ajanga northern England nung akhi mapang nungi Labour Party nem vote agütsürtem atsür aruaka Johnson tamendak dak Conservative tashi ita alidak tesemtem nungi vote samar, ta kari ashir.

Johnson indang parliamentary menden ya West London nung mile ter dang

pilar lir.

Vote agütsür dak imlaa liasü, saka Conservative Party ajanga parnok ashi manger amai parnok bilemer. Parnok aika Boris Johnson dang mepelar," ta Liberal Democrat lenir Ed Davey-i ashi.

"Ajaki north nung 'red wall' indang jembir, parnoki south nung 'blue wall' indang bilemtsüla.

1992 nungi Johnson'er Conservative Party tenung nung shikem agia arusang Cheryl Gillan taküm April ita asüba sülen Chesham and Amersham constituency nung election ya agi. 2019 küm tesüsa election agiba mapang Gillan-i pa den tokteper dang vote 16,223 agi timba ngua liasü.

Iran nung tir atema election agir ; Ebrahim Raisi shimtetsü imlar

Tehran, Aami/June 18 (Agencies): Iran nungertemi Hokulbarnü tir election nung vote agütsür, kong US-i tenokdangba agüja alisang obendanger kati takok angutsü amai lir, aser rongsenketsüng nung timtem ajurua linük nung aser bendanglen nungi liberals temi vote magütsütsü ayongzükba mapang aikati

shilem magitsü imlar.

Alima nung tashi tulu linük trok den 2015 küm nuclear tezüngzüktep yangluba tanaben asendenshitsü asoshi Iran-i merangba nung metakzüteti aliba mapang ka nung iba election ya lenirtemi timtem jenti ketdangsüba atema nüburtemi par tebilemba sayuba ka amai asadangteter.

Supreme Leader Ayatollah Ali Khamenei-i linük yimtiba, Tehran nung pa indang vote agütsüba sülen Iran nung dang vote agütsütsü ajungshi aser "vote ajak azüngtsü... arung aser vote agüjang aser nü tir shimtetang" ta ashi.

Küm pezü kümsük asembuba tenzüksü asoshi constitution ajanga tenokdangba

agütsüba sülen Hassan Rouhani melena ya hardline Ebrahim Raisi shimtetsü imlar.

Raisi, shiba pa yimtenren tsütsü lenir Khamenei ama anüolen linük anema nokdaker ka lir, aser küm aika tejakdang political prisoner tepsetba nung shilem agi ta tai tonglokja US-i tenokdangba (sanction) agüja lir.

"Raisi ya shimtetra, Iran nung tir makumdang tenokdangba agütsüba kisüng masü saka tir inyakba mapanga tenokdangba angur mezüngbuba asütsü," ta teshisadanger Jason Brodsky-i ashi.

US Tir Joe Biden-i alima ajunga nung human rights tsütsü kanga sashia rangloka lir, anungji Washington aser liberal Iran nungertem saksalemstü, ta Iran yimtenren asadanger temi ashir.

Senmang ama Iran indang Shi'ite Muslim putir inyaksang Raisi ya Khamenei-i 2019 küm obendangba nung tekolakba shimteta liasü.

Ita ishika lir United States-i pa nem tenokdangba agüja meimchir temeden nung aibelen, ta tai tongloksü, aser item

rongnung 1980s mapang political prisoner tem tepsetba aser 2009 nung sorkar anema ola adoker jemrepba densema lir, ta meimchi temenden asoshi nokdakba telok temi ashir.

Iran-i kodanga nisung aika tepsetba indang ya mejembi aser arishi küm 60 tain Raisi-ia yimjak nung kodanga pai shilem agi ta tai tonglokja aliba indang mejembi.

Yimti aika nung polling station kima nisung jenti nokdaka aliba video tem state television nunga sayuogo. Iran nung nisung million 59 dak tema vote agütsütsü temsüa lir. Vote agütsüba mapang ya 1930 GMT ako nung shibangtsü, saka ghonda ana atsülangtsü akok. Iba electon osang ya Honibarnü teroto tashinung sangdongtsü imlar.

Supreme Leader Ali Hosseini Khamenei kübok züngsem 12 aliba Guardian Council ajanga candidate noklang aika magizük aser item rongnung reformists aser Rouhani den sendaktepa alirtem densema lir.

(Maneni tapak 10 nung...)



Italy south tsütsü Sicily asetkong nung Catania anasa Belpasso nung aliba Santa Maria della Guardia church tesülen Mt. Etna, Europe nung active volcano tulutiba nungi lava jateta adokba noksa ka yangi angur. February 16, 2021 nungi tenzuka iba Mt. Etna nung mapang shia tesüngmangtsüka ali tatsük jateta adoker.

Advisor Neikha-i Dieze Sothu indang EP ka sayaogo



Kohima, Aami/June 18, 2021: Extended Play - '18' sayaba mapang, Advisor Zale Neikha aser kentener Dieze Sothu na külemi tangokba noksa nung angur.

Kohima, Aami/June 18, 2021 (TYO): Hokolbarnü, kentener tasen Dieze Sothu indang "18" ta nüngja agütsüba mezüng Extended Play (EP) ka, Nagaland Advisor for Youth Resources and Sports Zale Neikha-i sayaogo, ta sangdong ka ajanga metetdaksü.

New Minister's Hill nung Neikha'er kidang sentong ka agiba mapang, pai lanurtem dang mangdang tulu ayutsü aser taküm nung takok tajung angutsü asoshi bendanga aguja aser nendaka inyaksü

ajungshia liasü.

Nisung ajakibo IAS officer, doctor mesüra engineer akümtsü makok ta shia, pai lanurtem dang taküm nung takok angutsü asoshi Tsüngremi agütsüba sempet shitak nung amshitsüla ta ashi.

Sothu aser music wadang tsütsü sempet tajung alirtem dang pelaba metetdakja, Neikha-i, Task Force on Music and Arts ajanga sorkari state telungtet aser tangalen musician aser artist sempet ajungkettsütsü asoshi meranga

inyaksü, ta ashi.

Science nung Graduate asür kaketshir aser arishi küm 24 tain Sothu-i iba Extend Play indang jembiba mapang, iba ken ya angartem atsüa arutsü atema masü saka tebilemba lemsateptsü nükjidong nung yanglua liasü. Iba EP angashir temi pei taküm aser teshisadangba tem iba ken den medemdanga aser ibaji ajanga pei tebilemba tem lemsateptsü akok, ta pai ashi.

"18" ta nüngja agütsüba EP nung ken pungo dena lir aser item ken ya spotify, apple music aser youtube music densema tongtibang streaming platform ajak nung angutsü.

Iba EP sayaba sentong nung Eyotsono Neikha menden liasü aser sentong tenzüka Minister's Hill Baptist Church indang Youth Pastor, Vimrgokho Chüsi-i sarasademtsü. TaFMA Project Director Hovithal Sothu-a iba sentong nung dena liasü, ta kasa sangdong nung shia lir.

Imlie Lee (Dejavu)-i "Genesis" sayatsü



Dimapur, Aami/June 18, 2021 (TYO): Imlie Lee (Dejavu), shibai social media sabang ajanga pa indang music video tasenba dak sendakba nung osangtem lemsatep aruogo, pai music wadang tsütsü inyaka aser ajangshia aruba indang music video ka Honibar anepdang (19.06.2021) 8:00 ako meta sayatsü terenemba lir ta osang sangoktsüogo.

Iba music video nüngja "Genesis" alitsü aser music video ajanga State nung rapper

rongnung mezüng pur, Imlie Lee-i music wadang nung ajemoka inyaka aruba indang otsü lemsateptsü.

Iba ken nung, tourism atema Nagaland state brand ambassador, Onen Nenty dena lir. Iba ken aser music video nung lai mezüng shilem agiba angutsü.

"Iba ken ya music wadang nung inyaka aruba indang lir. Iba ken nung verse asem lir. Mezüng verse ajanga iba wadang nung ajemoka inyakba aser melenshia aoba indang

jembir. Mapang tatsüka atema iba wadang toktsütsüsa aküm saka tanaben music maparen inyaksü tenzüka. Tasembuba verse ajanga iba ken angar ajak den osang ka lemsatepner," ta Lee-i ashi.

Iba music video nung tetsür biker kar aser tsüngsanger telok - Ethnic Future dena lir.

Maneni, Genesis ken ya Imlie Lee-i zülua aser record yangluogo; aser Dezo Thira ajanga 'mastered' sütsü. Iba video ya Visual Craft ajanga produce süogo.

'Transfusion' nung Sam Worthington denogo

New York, Aami/June 19, 2021 (Agencies): Taruba project tasen ka nung Sam Worthington-i tongti shilem agiba angutsü. Arishi küm 44 tain actor Sam-i Phoebe Tonkin den iba thriller film tasen nung külemi shilem agitsü aser Matt Nable-i iba film direct asütsü.

Film maparen achaayangba dak alaka, Matt-i iba film nung shilem agitsü. Iba film ya Special Forces mapa nungi anener alir kati par jabaso taküm kümzüksü mechi telungpur den külemi inyakba otsü ka alitsü.

Tan hopta tetenzüklen,

Sydney nung 'Transfusion' atema production maparen tenzükogo aser 'Deeper Water Films' atema John Schwarz aser Michael Schwarz nati iba film yanglutsü. Executive producer ama iba project atema Cailah Scobie, Paul Wiegard, Will Clarke, Andy Mayson aser Mike Runagall nung aniokogo.

Aruya aliba Cannes Market nung iba film atema 'international sales' maparen tenzüksü.

"Matt ya writer aser actor tajung ka aser pai director' maparen nung ajemoka otsü ka

mapa kuma inyaksü asoshi yongya atar. Iba film script den apet pai actor tetemjen (Sam Worthington) aniokogo," ta Michael Schwarz-i ashi.

"Gold" nung onoki takok ngua inyakba sülen, Deeper Water Films den tanaben longjemshir aruya aliba Cannes nung Matt Nable indang ostü ka sayatsü asoshi yongyaseter," ta Runagall-i shisem.

Transfusion: project dak alaka, 'Gypsy Moon' nung Sam-i Lena Headey den külemi shilem agiba angutsü.

Mulungnen O



ASO:
14/03/1933

ASÜ:
16/06/2021

Onoki teti meimba aliba ojala **Asür BENDANGTULA** (Molungkimong), la shiranga aliba mapang aser la iba lima nungi pilar onok mangyim jashi nung alidang shirnokisa onok dang meima sarasadem, nübu aser rongsen agi yariogo, nenok ajak dang onoki kanga pelaba lemsateper.

Tsüngremi nenok temeim mapa tajung asoshi moajang ta onoki sarasademtsür.

Temeim Chirnur, Semchirtem aser Kinungertem.

Shamator nung ambulance ka tenzüksüogo



Shamator, Aami/June 18, 2021 (TYO): Hokolbarnü, Shamator, Tuensang nung ambulance ka tenzüksüba sentong agia liasü, ta sangdong ajanga metetdaksü.

Iba sentong nung, V/P NDPP Shamator area, Rhakhiumong; Vice President Yimchungrü Tribal Council, Kiuji aser tanga lokti lennirtemi jembio.

JCC-i, nüburtem ajanzüksü asoshi longjemer inyaksü indang tongtibangtem lemsatep aser Shamator nung alir nüburtem asoshi aria

bilemtsüba atema, JCC-isa telok tentet balala, kija, Advisor I&PR, VG aser SCERT, Toshi Wungtung, Chief Minister, Neiphui Rio aser Minister H&FW, Pangnyu Phom nung dang pelaba metetdaksüogo.

Rev. Thsankiu-i iba ambulance meshiteta sarasademtsü aser iba wara anema raraba maparen nung ajaki amalitepa inyaksü asoshi pai ayongzüka. Iba sentong nung Medical Officer, Dr. Mhathung menden liasü, ta kasa sangdong nung shia lir.

Natalie Imbruglia-i kensep tasen ka sayatsü

London, Aami/June 18, 2021 (Agencies): Kentener, Natalie Imbruglia-i kensep tasen ka sayatsü tebilemba lir. Küm trok nung iba kensep tasenba ya Natalie indang mezüng kensep alitsü.

Arishi küm 46 tain Natalie-i la indang kensep trokbuba - 'Firebird' sangdongogo aser taküm September 24 nü lai iba kensep sayatsü. 2015 küm Natalie-i 'Male' kensep sayaba ajaki jangjaa lir.

"Firebird" kensep sayatsü osang lemsateptsü maongka anguba atema pelar. Iba kensep ya September 24, 2021 nü sayatsü aser alima ajunga nung tejangrar temi iba kensep jelia mekaa yutettsü akok," ta Instagram ajanga Natalie-i lemsatep.

Nüngtugu ken - 'Torn'



atenla Natalie-i iba record takok ngua yanglutetba atema pelaba lemsatepogo.

Natalie-isa Hokolbarnü (18.06.21) 'Build It Better' ta nüngja agütsüba ken ka sayaogo. Sony BMG den tenanzüktep agiba sülen küm ama lir lai iba ken sayar alitsü.

Euro 2020: Netherlands round of 16-i iogo

Amsterdam, Aami/June 18, 2021 (Agencies): Hokolbarnü, Euro 2020 -Group C nung Netherlands-i ayong ayonga goal 2-0 agi Austria akokba sülen, round of 16 tongteter rongnung parnok team tasembuba kümogo. Iba asayamung nung Italy aser Belgium na round of 16 tongteta lir.

Iba asaya nung, Memphis Depay aser Denzel Dumfries nati goal ka ka idakja Dutch puri Euro knockout round tongtetsü maangka angu. 2008 küm nungi tan asayamung nung Dutch team mezüing round of 16 tongteter alitsü.

Group C point table nung Netherlands-i asaya ka anünga aliba den parnoki temaba jenjang tongteta lir.

Netherlands-i taoba

international football asayamung ana tashi nung makokba ajanga qualify mesütet, saka tan Euro 2020 -Group C asaya ana nung parnoki takok nguogo.

Telok ana tsüingda asaya tenzüker, Depay-i penalty ka metsütsü maangka ngua minute 11buba nung pai mezüing goal idaktsü. Iba goal densema, Depay-i International asaya 66 nung goal 27buba idaktsür alitsü.

Goal 1-0 agi Netherlands pur Austria tejakdang ser mezüing half tembanger, tanabuba half nung, PSV Eindhoven nungi asayar Donyell Malen-i külem team pur Dumfries dangi ball metsülöktü aser pai (Dumfries) minute 67buba nung goal tanabuba idakja liasü.

Netherlands-i tesüsa

asayaba match 22 tashi nung mezüing goal idakja aruba mapang, parnoki item asaya ajak kokogo. Item asaya nung parnoki goal 68 tashi idaktsü aser goal tenet dang agüja lir.

Group C nung Netherlands takok anguba mapang, kasa telok nungi North Macedonia tsükadokogo. Iba European Championship nungi mezüing tukadoker team rongnung North Macedonia alitsü. Group C nung North Macedonia pur asaya ana nung tamakok nguogo aser parnoki final nung Netherlands den junga asaya yongjia iba group nung parnok jenjang pezübuba nung tembangtsü.

Ano külen, Group C nung tanaben jenjang nung tembangtsü atema Austria-i Ukraine akoktsüla.

Wimbledon nung Naomi Osaka masayatsü

Los Angeles, Aami/June 18, 2021 (Agencies): Aruya aliba Wimbledon asayamung nungi Japan tsür Naomi Osaka tukuogo, ta Osaka indang agent Stuart Duguid-i sangdong ka ajanga osang jangjatsüogo.

World no. 2, Osaka temang nung timtem kar ajanga tawa tembangba French Open nungi tukadokba sülen, Wimbledon nunga lai shilem magitsü lemtetogo.

"Taküm Wimbledon nung Naomi masayatsü. Lai mapang tatsüka lar adianu aser medemer tem den külemi anisüngzüka mungner. Tan Olympics nung lai asayatsü terenemba lir aser la alidak fans matsüingdang asayatsü asoshi yongyar," ta Stuart-i ashi.

Bodhbarnü, Wimbledon achaayangertemi sangdong ka ajanga, arishi küm 23 tain aser pezüben Grand Slam champion, Naomi Osaka-i iba championship, koba June 28 nungi tenzüktü, iba asayamung nung shilem agitsü imlar, ta lemsatapa liasü.

"Tang tashibo la iba championship nung dena lir



aser lai iba asayamung nung shilem magitsü asoshi osang tejangja mangazük," All England Club chief executive Sally Bolton-i ashi.

French Open asayamung nung shilem magitsü lemtetba külen nungi osang balala ajanga Osaka indang jembija arudar.

Media inyakyim dak sendakba nung Osaka-i temzüing kar nung manidaktsü lemtetba sülen, la dang dollar 15,000 senchi achi aser Roland Garros nungi agienadoktsü la amokmerena liasü.

2017 aser 2018 Wimbledon nung Osaka-i round tasembuba makok aser 2019 küm kasa asayamung mezüing round nung la tukadok. Taoba küm,

coronavirus wara süshia maoba ajanga Wimbledon thitemja liasü.

Brehostibarnü, anaben tashi Wimbledon takok angusang, Rafael Nadal-i pa asaya wadang tsütsü temulung agütsütsü nükjiding nung taküm indang Wimbledon aser Olympics nung shilem magitsü osang jangjatsüogo.

French Open asaya ka nung dang shilem agir sülen Osaka-i iba campaign toktsü aser tang Wimbledon nungi tukadokba ya asayamung tanabuba alitsü.

Roland Garros sülen, Berlin kübok ayongba WTA asayamung nunga lai shilem magi.

Tokyo Olympics nung Osaka-i shilem agitsü imlar aser Japan atema lai gold medal ajangzüktetsü teimla tulu lir.

Tesüiba küm ishika tejakdang nungi, tetsür tennis tsütsü, asayar takotet ka ama Osaka-i takok tajung balala ngua arudar; aser lai Grand Slam title pezü tashi nguogo. 2018 aser 2020 US Open den 2019 aser 2021 Australian Open nung lai item title ajangzüktet.

Iran nung tir atema election...

(Tapak 8 nungi...)

Raisi-i takok angunungbo Rouhani ama takok ngua yimten yimsüsür samatsü, shiba US-i nuclear tezüingzüktep nungi ainshitsü lemteta tenokdangba agütsüba ajanga tashi meiti akum.

"Timtem khuret liaka election ya kanga tongtipang... Tenüing zülüokba anogo nungi tenzüka iba amala tembilemtsü ya mali tajungba süla," ta Rouhani-i vote agütsüba sülen election nung conservative candidate tejangja aika nokdangba nung kongshia ashi.

Ketdangsurtemi vote agütsür ya shilem 44 shi asütsü, ta ketdangsurtemi asadangteta lir, koba taoba election dang

nungi kanga agi tajemba lir.

Raisi-i takok anguba ajanga Iran-i tezüingzüktep asendenshitsü merangba nung timtem magütsütsü aser totzü aser senotsü tsütsü tenokdangba tesashi agüja aliba nungi salatsü, ta Iran ketdangsurtemi ashi, kong linük yimsüsür putir tem yagi par yimten temoatsü ya rongsenketsüing tsütsü jenjang mejungi akumba ketdangsuba nung keta lir, ta meteta lir.

"Raisi atema tembilemtsü tulutibaji rongsenketsüing alitsü. Linük rongsenketsüing timtem atema pai taneptsü magütsütetera longkak ait tenzüktütsü," ta sorkar

ketdangsur kati ashi.

Osettsüset nung jenjang atuba aser mali akumba ajanga anokshija aliba putir lenirtem asoshi vote jenti nüngdaker, kong makamait aser Iran tesem ajunga nung yimtenren tsütsü tenokdangba agütsüba ajanga 2017 nungi longkak aita raksatsü.

Raisi den tokteper rongnung tejangja nübu kaji pragmatist technocrat aser taoba mapang central bank nung governor inyaka alisang Abdolnaser Hemmati ya alitsü, aser hardliner kati danga takok angunungbo bendang linük temi tenokdangba tali agütsütsü, ta pai ashir.

Copa America: Brazil quarter final-i iogo

Rio de Janeiro, Aami/June 18, 2021 (Agencies):

Brehostibarnü, Copa America asayamung nung, Brazil-i 4-0 agi Peru koka Neymar'er telok iba asayamung knock-out stage atema qualify asür rongnung mezüing team kümogo.

Brazil atema Alex Sandro, Neymar, Everton Ribeiro aser Richarlison nungeri goal ka ka idakja, par teloki asaya tukububa atonga takok angur alitsü. Iba den külemi Group B nung Brazil-i asaya 2 nungi point 6 nguogo aser Peru pur table punglanglen alitsü.

Iba asaya mezüing half nung Sandro-i idaktsüba goal dak alaka, Telok ana tsüingda kangarabo toktepa masaya, saka break sülen, Neymar asaya yimya ajanga Brazil pur jangrabangra asayatsü tenzüker aser parnoki ayong ayonga takok angu.

"Iba takok ajanga kü mulung nung kongshioogo, kechiyong tesüiba küm ana nungi timtem aser mepetmesü jenti ajangshia aruogo," ta Neymar-i ashi.

Tesüiba küm ana tejakdang,

Brazil-i Copa America takok anguba mapang Neymar yiruba ajanga pai iba asayamung nung shilem magitet. Ano külen, iba asayamung metenzükdang, tetsür dak tashiyim amshia shi nung medemba ken o nung Neymar dak tai tonglokja liasü, saka kuli tejangja peria maliba ajanga iba ken o agienadok.

Peru, shirnoki taoba Copa America final tongteta asaya, saka iba final nung Brazil-i goal 3-1 agi parnok tsükdaktü.

International game 107 nung Brazil atema Neymar-i goal 68buba idaktsür alitsü aser goal tuku agi Brazil nunger nüngtugu asayar Pele indang record temeneper dang lir. Pele-i asaya 92 nung Brazil atema goal 77 tashi idakja lir.

"Brazilian national team nungi asayatsü maangka anguba ya konang ama lir. Seleccion atema asayatsü aser iba jersey semoktsü kü mangdang liasü. Linük atema goal paika idakja tanü ni iba jenjang ajangzüktetsü ta kodanga meblem," ta Neymar-i ashi.

Tokyo Olympics atema Indian men's hockey squad sangdongogo

Bengaluru, Aami/June 18, 2021 (Agencies):

July 23 nungi August 8, 2021 tashi ayonga asayatsü aliba Tokyo Games atema, Hokolbarnü, India-i züingsem 16 - tebur hockey squad nung Olympics nung mezüing shilem agitsüpur asayar 10 anisemogo. Iba squad nung asayar takotet talisa PR Sreejesh aser Manpreet Singh na dena lir.

Iba squad nung Olympics nungi mezüing shilem agitsüpur temji Amit Rohidas, Hardik Singh, Vivek Sagar Prasad, Nilakanta Sharma, Sumit, Shamsher Singh, Dilpreet Singh, Gurjant Singh aser Lalit Kumar Upadhyay nunger alitsü.

Defender, Birendra Lakra, shiba temkok yiruba ajanga 2016 Games nung shilem magitet, pa iba squad nung denogo aser Tokyo Olympics nung pai mezüing shilem agiba angutsü.

"Final selection nung asayar 16 shimtsü maparen tezüba

masü, kechiyong iba telok nung asayar tajung aika dena lir," ta Indian men's team chief coach Graham Reid-i ashi.

Iba Games indang hockey telemsa nung, India tebur team ya defending champions Argentina, asemben world champion aser world no.1 Australia, New Zealand, Spain aser Japan nunger den Pool A nung dena lir.

Tokyo Games atema Indian men's hockey squad yamai alitsü:-

- Goalkeeper: PR Sreejesh
- Defenders: Harmanpreet Singh, Rupinder Pal Singh, Surender Kumar, Amit Rohidas, Birendra Lakra
- Midfielders: Hardik Singh, Manpreet Singh, Vivek Sagar Prasad, Nilakanta Sharma, Sumit
- Forwards: Shamsher Singh, Dilpreet Singh, Gurjant Singh, Lalit Kumar Upadhyay, Mandeep Singh

October ita nung Covid wave... (Tapak 7 nungi...)

Tanga tasüingdangba ka langzür 38 nungi parnok 25-i, tang aliba coonavirus vaccines yagi tarutsü nung coronavirus variant tasen menokdangtetsü, ta ashi.

Parnok 30-i, India nung ano maneni coronavirus ya küm ka tashi amokmeren ka asütsü, ta metetdaktü. Parnok 11-i, iba wara ya India nung küm 1 den tajemba alitsü ta ashi, parnok 15-i iba wara ya India nung küm 2 den tajemba alitsü ta ashi, parnok 13-ibo iba wara ya ano

küm ana tashi alitsü ta ashi aser mongin anatibo, iba wara ya kodanga mesamatsü, ta ashi.

Global Virus Network nung Scientific Advisor aser University of Maryland kübok Institute of Human Virology nung Director, Robert Gallo-i, "Covid-19 tembilemtsü ya bentetsü akokba tembilemtsü ka lir, kechiyong asenoki melamela iba vaccine-a ngutetogo. Küm ana tashi nungbo India nung vaccine ajanga iba wara koktetsü," ta metetdaktü.

BILEMDANGANG

"Tensa den apet jembitettsü teti renema alitsüla."